

親征平定朔漠方略

二十

親征平定朔漠方略卷之三十一

十月甲申朔。

命加恩大將軍伯費揚古軍士

上諭尚書馬齊曰。大將軍費揚古所領軍士甚爲勞苦。食用必致缺乏。欲將朕所用牲口發去。道路遙遠。牲畜旣瘠瘦。且須時日。可遣人往尚書班第處。取殺虎口大同等處。現存銀五千兩。遣官

一員。送至大將軍費揚古所。酌買皮裘牛羊等物。給與軍士。

上閱牛羊羣。

賜諸王大臣官員食。畢。使喀爾喀多羅郡王塞稜
阿海台吉阿里雅阿爾薩郎衛代青。及厄魯
特降人射。

上率諸皇子射。

上連中五矢。諸皇子皆屢中。喀爾喀諸王及蒙古諸王台吉厄魯特降人。無不驚服。

上問塞稜阿海王等。喀爾喀厄魯特交戰之由。

顧諸王大臣曰。今日喀爾喀厄魯特皆在。朕直論其事。彼皆向來貢獻本朝之國。兩國交惡。其曲不在厄魯特。而皆在喀爾喀。喀爾喀先犯厄魯特。喀爾喀理曲。是以其國爲厄魯特所破。但厄

魯特借伐喀爾喀爲名。進我境內烏攔布通之地。爲我師所擊敗。已立誓不復侵喀爾喀矣。今又背誓。入犯我邊汛。屯於克魯倫之地。則厄魯特理曲。是以朕親統六師滅之。天道昭然。毫釐不爽。朕爲天下萬國之主。寧有偏徇之理乎。朕所以破厄魯特者。非爲喀爾喀也。喀爾喀王塞稜阿海。及厄魯特降人沙克朱木等。皆跪而

奏曰。此等曲直。臣等向愚昧不知。今蒙

皇上伸明大義。兩國致敗之由。方得曉然。此實我等
之所自取也。諸大臣奏曰。

聖諭精詳。誠爲至論。兩國之人。俱傾心悅服矣。

丙戌。

駕至胡虎額爾奇。

命大將軍伯費揚古駐劄喀倫。收厄魯特降人。先

是厄魯特降人。言噶爾丹往博羅烏納罕奎
金札巴干等處度冬。語丹濟拉。爾可至博羅
烏納罕覓我云。

上於是

諭議政諸臣曰。大將軍伯費揚古進兵矣。聞右衛
兵每人乘馬一匹。負行李於驢騾而往。其廐亦
瘦云。朕料其斷不能到噶爾丹所在。必自翁金

謂馬瘦而回。兵徒勞而無益於事。朕秣馬於大
同者。特欲驗實噶爾丹所在。如目前有可行機
會。則於黑龍江六百兵中。選前鋒二百。新滿洲
四百。察哈爾部落兵一千。整齊鎗砲。令備肥馬
駝。可一舉勦滅之。噶爾丹已破盡。今我何故不
深爲勦滅之之計。而空勞軍馬乎。今速檄大將
軍伯費揚古。止其進兵。至是大將軍伯費揚古

奏言。官兵馬瘦。已回喀倫。

上交議政諸臣議。隨議大將軍伯費揚古。因馬瘦回

喀倫候

旨。皆如

上諭矣。現今大將軍回居喀倫。應檄費揚古給右衛
兵到歸化城之米。自歸化城支米歸右衛。其
餘之米。給黑龍江官兵。

御賜銀五千兩。大將軍可酌備皮裘乾糧等物。分給官兵。駐扎喀倫附近地方。暫俟差往丹濟拉處使人津巴歸。併收厄魯特降人。

上准行。止令護軍統領瓦爾達留大將軍軍前。

副都統祖良璧奏

聞翁金破賊情形。祖良璧奏曰。臣率正黃旗滿洲

叅領賽必漢正藍旗漢軍叅領李枝聯官兵

五百名及護米漢軍叅將張憲載遊擊陳維屏等官兵五百名在翁金地方守護米糧因不知大兵回否信息於九月初一日集諸臣商議翁金地方所有米石無多若在此久待衆兵所携之米不足食回寧夏因於九月初六日回師是日早啟行據正白旗署前鋒叅領敦朱祐遣鑲黃旗前鋒護軍校和尚報稱

蒙古賊八人來奪行李。敦朱祐同千總劉進孝領官兵追逐而去。臣一面遣正藍旗署叅領馬朝龍撥滿洲漢軍官兵六十名。叅將張憲載領兵四十名。速行偵探來報。臣卽率滿洲漢軍隨後而進。行不數里。與千餘賊相遇。臣親率賽必漢李枝聯所領滿洲漢軍官兵。併張憲載所轄漢軍官兵。排列鳥鎗。官兵奮

勇前進。蒙古賊兵分爲兩路。圍逼臣等。臣等率領官兵。從東殺出。見賊分頭搶奪行李。臣卽整齊士卒。用把總吳進所携子母礮二門。併鎗手廝卒。排列成陣。各執長鎗木挺。合力前進。自卯至巳。放鳥鎗三四十次。連發十餘矢。仰伏。

天威大敗蒙古賊兵。斬殺厄魯特百餘人。賊向西北。

而遁。臣同叅將張憲載領漢軍官兵追殺二十餘里。此皆

皇上天威遠播。蒙古賊兵魂魄俱喪。故能致此大捷。但蒙古賊兵狡猾。而翁金地方山險谷深。不可深入。故不窮追。收兵而回。於本月二十七日。已抵寧夏。謹繕疏以

上曰。祖良璧於翁金地方。守護糗糧。回師之時。遇賊
千人。忽來侵犯。率領滿漢官兵。擊敗厄魯特。斬
殺百餘人。據厄魯特降人言。我官兵奮勇直前。
大敗丹濟拉。創鉅痛深。官兵効力可嘉。在事有
功人員。著分別議叙具奏。

上諭皇太子曰。欽天監官員。前因步軍初放排鎗。卽
奏稱天鼓響自西北。適朕所遣之人。回奏情由。

彼頗惶懼。叩首懇求。將疏持回。又一次奏稱。日
午地動。朕謂舉國之人。何無一覺者。若輩辭窮
奏云。惟臺上覺動。朕亦姑容之。在監人員。類皆
怪異。妄誕微末小人。朕躬在外。恐搖惑人心。捏
造訛言。亦未可定。若衆人皆知。卽屬實事。若舉
國不知。殊有關係。不可不詳爲留意。值更太監。
亦屬微末。欽天監旣經奏聞。彼自附會其說。值

更之處甚多。不宜止以太監之言爲憑也。

上諭皇太子曰。朕於二十九日。度察罕拖羅會嶺。駐蹕於喀喇巴爾哈孫之地。是日閱鑲黃旗牛羣。其數至一萬六千頭。毛色甚佳。三十日。駐蹕於昂古里湖地。是日閱右翼達卜孫腦爾之馬羣。其數至二萬匹。整齊肥壯。不可言喻。初一日。駐蹕於俄羅特布拉克之地。是日閱正黃旗牛羣。